

# Alfons Tuor 1904-2004 : han las steilas dau avis al poet ? Ina emprova

Autor(en): **Lombriser, Clau**

Objektyp: **Article**

Zeitschrift: **Annalas da la Societad Retorumantscha**

Band (Jahr): **117 (2004)**

PDF erstellt am: **27.06.2024**

Persistenter Link: <https://doi.org/10.5169/seals-236866>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

# Alfons Tuor 1904 – 2004

## Han las steilas dau avis al poet?

### Ina emprova

*Clau Lombriser*

Avon 100 onns, ils 19 da mars 1904, ei morts a Rabius il poet Alfons Tuor, in dils pli enconuschents scribents dalla Romontschia. Mo 33 onns ha sia veta cuzzau, e tonaton – ni ual perquei – ei siu relasch litterar considerabels.

La vischnaunca da Sumvitg e particularmein siu vitg natal, susteni dal CMM e dalla Romania, han undrau commensuradamein lur renomau convischin: cun in luvratori da scriver per las scolas dalla vischnaunca, ina serada litterara a Rabius ed ina fiasta populara la dumengia (18–21 da mars)<sup>1</sup>.

Pader Clau Lombriser OP, sez convischin da Rabius, ha salvau il priedi a caschun digl act festiv en baselgia e sin santeri e cun quella caschun interpretau pli da manedel ina dallas pli enconuschentas poesias d' Alfons Tuor: *Allas Steilas*. Per las Annalas ha Clau Lombriser surluvrau siu priedi ed extendiu sias consideraziuns sut il tetel: *Han las steilas dau avis al poet?*

### O schei vus caras steilas...

Dapi Carli Fry savein nus che las duas poesias *Allas Steilas* ed *Il Semnader* s'audan tier las canzuns «*las pli profundas et formalmein las pli perfetgas*» che Alfons Tuor ha scret<sup>2</sup>. *Allas Steilas* s'auda «*en fuorma, ritmus e patratg tier il meglier che Tuor ha scret*»<sup>3</sup>. «*Alfons Tuor gehört unstreitig zu den besten Lyrikern des rätoromanischen Schrifttums*»<sup>4</sup>. «*Alfons Tuor po esser considero scu il meglder poet lyric sursilvaun dal 19avel tschientiner*»<sup>5</sup>. «*Allas Steilas vegn mai a murir,*

---

<sup>1</sup> *La Quotidiana* 15.10.03 / 12.1.04 / 23.1.04 / 13.2.04 / 4.3.04 / 22.3.04; *Bündner Tagblatt* 22.3.04; *Südostschweiz* 22.3.04

<sup>2</sup> *Tschespet* 16, p. 30

<sup>3</sup> *Tschespet* 14, p. 15

<sup>4</sup> MAURUS CARNOT, citau tier GION DEPLAZES, *Bedeutende Bündner II*, p. 493

<sup>5</sup> RETO R. BEZZOLA, *Litteratura dals Rumauntschs e Ladins*, p. 445

*aschiditg ch'ei dat in romontsch*»<sup>6</sup>. Quels pareris vegnan recepi quasi religiosamein d'in commentari a l'auter e d'ina generaziun a l'autra.

Che las *Steilas* digl Alfons Tuor ein aunc oz buca stizzadas ella memoria retoromontscha ei era d'attribuir al fatg che nundumbreviels cantadurs e cantaduras han fatg **cantond** enconuschientscha cun las *Steilas*, ella versiun da Tumasch Dolf ed en quella – sublima – da Duri Sialm. In text litterar revelescha siu potenzial e sia qualitat ual leu nua ch'el inspirescha la cumposiziun musicala con-eguala, quei ch'ins astga tutttavia attestar a Duri Sialm.

Ad Alfons Tuor han ils da Messa era d'engraziar il «*Tutpussent altissim Diu*», ina profunda versiun romontscha dil coral tudestg «*Grosser Gott, wir loben dich*» che vegn aunc oz cantada stediamein en baselgia<sup>7</sup>.

Tonaton astga ins sedumandar **pertgei** che la poesia *Allas Steilas* duess s'uder, buca mo formalmein, tier las pli reussidas e profundas che Alfons Tuor ha scret e pertgei che Romontschs e Romontschas tegnan ella aunc oz aschi ault.

Mereta ella quella stema? E pertgei? Tgei damonda drezza Alfons Tuor propi allas steilas? E tgei avis dattan ellas al poet? Dattan ellas insumma risposta? Sa il giuven malsaun, suenter ver contemplau il tschiel stelliu, pertgei ch'ins viva sin tiara mo in mument? E daco paleisa el aschi pauc da quei a nus? San ins dir sur da quella poesia dapli che quei ch'ei gia vegniu detg e scret entochen dacheu? Eis ei lubiu da prender quella poesia e leger denter sias lingias, per mirar sch'ella mereta da survivor 100 onns suenter la mort da siu autur?

In buca pign problem setschenta gia alla biala entschatta: Ei exista ord la plema digl autur pliras versiuns dalla *Steilas*<sup>8</sup>. Tgei versiun ei autentica? Tgeinina ha Alfons Tuor preferiu? Spitgond ina ediziun critica da quei text serefereschel jeu en mia emprova alla versiun classica edida (e gia surluvrada!) da Carli Fry e reprida ella ediziun da poesias d'Alfons Tuor procurada da Gion Deplazes igl onn 1952<sup>9</sup>.

---

<sup>6</sup> GION DEPLAZES, *Steilas*, p. XII

<sup>7</sup> *Alleluja*, canzun 2

<sup>8</sup> Mira BEZZOLA, p. 446

<sup>9</sup> A caschun dalla serada litterara a Rabiun ha il giuven romanist Renzo Caduff referiu cumpetent davart las ediziuns e reediziuns dalla ovra d'Alfons Tuor, senza denton tractar la damonda dalla versiun «autentica» dallas *Steilas*. Sia lavur cumparascu lavur da licenziat alla Universitad da Friburg.

## Allas Steilas

O schei vus caras steilas  
El firmament:  
Pertgei viv' ins sin tiara  
Mo in mument?

Pertgei ston ins sin tiara  
Pitir, pitir,  
Quei cuort mument ch'ins viva  
E lu murir?

E dei vus caras steilas  
A mi avis,  
Vus che la stgira tiara  
Schi dultsch sclaris!

Savens, savens jeu stoiel  
Vus contemplar –  
Tgi lai cun tonta gloria  
Vus tarlischar?

O, quel ch'ei vies Scaffider  
Ha mei scaffiu,  
Quel che vies cuors diregia  
Ei er miu Diu!

Perquei il mal emblida  
Miu cor suffrent,  
Cu 'l ellas sferas vesa  
Vus a sclarend.  
O caras, dultschas steilas,  
Jeu sai, jeu sai:  
Sur vus, en tschiel, leu vivan  
Ils spérts beai!

E cu jeu vus contemplel  
El firmament,  
Sai jeu pertgei ch'ins viva  
Mo in mument!

## Pertgei ston ins pitir, pitir...

Centenaris da poets e scribents ein buca senza resca. Undrar in um ch'ei morts 1904, pia exactamein avon 100 onns, pudess far crer che nus vein cheu da far cun in vegliander. En verdad undrein nus in um giuven che ha viviu mo 33 onns, exact tons sco Jesus da Nazareth (la cumparegliaziun fa senn!), e ch'ei morts senza famiglia e senza figlianza. Quels ses 33 onns da veta han denton tunschiu per che nus se-regurdeien aunc oz dad el.

Alfons Tuor ei da giuven ensi malsanetschs. El pitevi d'ina «*enflamaziun tuberculosa della giugadira dil calun*», scriva siu biograf Carli Fry<sup>10</sup>. La malsogna ei gia sefatga valer dal temps ch'el era student alla scola cantunala. Ni las operaziuns ni las curas da pli tard el Bogn da Peiden han purtau remedura.

Fuss Alfons Tuor vivius 100 ons pli tard vess la medischina moderna ualti carteivel saviu salvar e curar el. Fuss quei stau davantatg per sia ovra litterara? Per sia veta insumma? Fuss Alfons Tuor poet valeivel e carstgaun verdeivel ual perquei ch'el ha viviu «*mo in mument*», ei seconsummaus giuvens e vegnius madirus avon che uras dalla suffrientscha? Vess Alfons Tuor scret sia famosa poesia *Allas Steilas* en cumpleina sanadad, ual maridaus, alla entschatta d'ina briglianta carriera sco professor, fuss quella canzun in clische e dess el trivial sche buca el banal<sup>11</sup>. Igl endirar dil poet e scribent Alfons Tuor dat a sia ovra trasatras verdeivladad e legitimaziun, senza che quei fatg schurmegi siu relasch, en special sia lirica, dalla critica litterara. Poets ein buca buns **perquei** ch'els ein malsauns e malsanetschs!

Sia suffrientscha exprima Alfons Tuor poeticamein en vestgiu religius e marian. Ual quella sensibladad religiosa explichescha denton era la veina sociala dil poet, siu fin sensori per quei ch'ei gest e malgest, siu prender partida pils paupers e pupratschs, sia aversiun encunter tirans e castellans, siu sprezz per rehs e pussents. Feglias dalla «*sursensibladad*»<sup>12</sup> ein plinavon siu humor satel e sia satira temida, mурdentа.

---

<sup>10</sup> *Tschespet XVI*, p. 30, nota 90

<sup>11</sup> FRY ha registrau alla fin da sia veta cun sorprendenta sinceradad il dilemma dil poet che exalta en giuvens onns la vertit dalla crusch la quala daventa vonzeivi «*greva da murir*»; *Striaunas II*, p. 116

<sup>12</sup> «*In ton dils accents mурdents ein d'attribuir a sia sursensibladad*»; CARLI FRY, *Tschespet XVI*, p. 31

Con fetg che la malsogna maligna d' Alfons Tuor periclitava sia existenza demuossa siu viadi a Lourdes. Alfons Tuor ei serendius il matg 1897 en cumpignia da 3 auters sursilvans sco pelegrin a Lourdes, sperond che Nossadunna urbeschi ora ad el sanadad, gie schizun medegheschi el<sup>13</sup>:

Maria, sche ti lesses  
Mei medegar savesses,  
De quei sun jeu segirs.  
Ti has leutier pussonza,  
Jeu hai en tei fidonza:  
O teidla mes sospirs.

Era sch'igl Alfons Tuor ei returnaus da Lourdes senza haver anflau migliur corporala sche ei quei pelegrinadi dil giuven sursilvan en quei liug da grazias in indezi da pietad autentica che las formulaziuns convenziunalas da numerusas da sias poesias religiusas laian buca exnum percorscher<sup>14</sup>.

La Frontscha fuva buca tiara nunenconuschenta per Alfons Tuor. Naven dalla Universitad da Turitg fuva il giuven filolog serendius a Paris per studiar alla Sorbonne. Igl ei bi da saver che las *Steilas*, quei fretg savurus dalla litteratura romontscha, ei semadiraus egl jester, sut auters tschiels, en ina mansarda da Paris.

Ins vess pudiu tertgar che Paris, marcau mundial par excellence da lezzas uras, vess fascinau il giuven grischun. Il cuntrari ei il cass! Paris ha fatg sin el sulet «*in stermentus respect*». Alfons Tuor ei denton buca ius cun egls serrai tras il marcau sper la Seine. A Paris ha el beingleiti constatau enorms problems socials. El ha viu paupers che ston «*ga-leid' envan leu trer per quels rehuns*». Quei ha fatg vegnir igl autur unfis «*da tei ludar e tei alzar, o grond e bi Paris*». En siu combretgel da student, mudergiaus dal calun che dola incontin, tschaffaus dil

---

<sup>13</sup> Alla Mumma della misericordia

<sup>14</sup> El *Calender Romontsch* 1898 dedichescha Alfons Tuor in pli liug artechel a Lourdes, quei liug da pelegrinadi da lezzas uras en plein svilup e che fascinava l'entira Europa e carmalava neutier fuolas da sauns e malsauns. Igl ei interessant da constatar che AT descriva il liug el stil d'ina reportascha, senza schar percorscher ch'el sez seigi serendius a Lourdes sco pelegrin **malsaun**.

schar encrescher e forsa era suls, van auters patratgs atras il tgau dil giuven poet: «*Pertgei viv' ins sin tiara mo in mument*»?

### Pertgei viv' ins mo in mument...

La damonda, prida sco tala, suera stagn da **catechissem**. Generaziuns da catolics han empriu ordadora l'emprema damonda dil cu-disch da ductrina: *Pertgei essan nus sin tiara? Nus essan cheu sin tiara per adurar Diu e vegnir enta parvis*.

Quella impressiun vegn sustenida digl «*ins*» alla entschatta dalla poesia. Cheu plaida il poet (aunc) buca ella emprema persuna. El scriva buca dad el sez. «*Ins*» sedamonda vul dir: «*tuts*» sedamondan, baul ni tard, pertgei ins vivi sin tiara mo in mument, e buca perpeten! Il tema ei pia la svaneivladad dalla veta e da tuttas caussas. Co sa il carstgaun seresignar al fatg ch'el ei buca Diu e buca eterns?

Viu da cheu anora ha igl aspect dil mument nuot da far cun la cuorta veta digl Alfons Tuor. Era sch'il poet fuss vegnius 80 onns vegls vess el viviu «*mo in mument*», pia buca en perpeten. La veta ha ina **fin**, e quei per tuts. Pertgei? Tgei munta quei cunfin? E tgei munta el per tgi che sto viver, sco Alfons Tuor, cun la perspectiva dalla mort gia en giuvens onns?

Cert: davos la damonda dil poet engarta ins era il giuvenaster, il student, il filosof che tschenta, sco tons auters litterats avon e suenter el, la damonda dil viver cheu sin tiara. Ed ei Alfons Tuor buca era il poet dalla melanconia, dil schar encrescher per quella patria ch'el ha zuar adina puspei ludau mo forsa mai giu, mai anflau?<sup>15</sup> Dat ei insumma patria, e nua fuss ella d'encurir? **Sut** las steilas, el vitg natal? **Sur** las steilas, tiels spérts beai? Ni forsa semplamein en santeri?

La secunda damonda, quella suenter il -dubel- **pitir** «*quei cuort mument ch'ins viva e lu murir*»<sup>16</sup> ei evidentamein pli existenziala e per-

---

<sup>15</sup> Bezzola characterisescha il schar encrescher sco «*quaist sentimaint uschè dominant illa poesia rumauntscha*», p. 448.

<sup>16</sup> Ina emprema versiun dallas *Steilas* scriva «*smarschir*». Il lungatg d'Alfons Tuor en connex cun la mort ei nius e crius. En santeri «*sbluccan tei ils viarms*». Il plaid «*levada*» ei inexistents ella poesia religiosa d' Alfons Tuor.

tucca il poet persunalmein. Ella fora igl autur el viv da siu spért e da sia carn ed ei dil reminent presenta en autras poesias nua ch'il griu desperau dil malsaun para pli dramatics ch'ellas *Steilas*<sup>17</sup>:

Roschas onns jeu sun malsauns,  
Segner buntadeivel ;  
Gida ussa cun tes mauns  
Mei schi sventireivel!  
O, ti che has buontad danvons,  
Ti vul mei schar murir?  
Vul schar mei en mes giuvens onns  
Schi malamein pitir?

Sil pli tard ella secunda strofa dallas *Steilas* survarga la damonda d'Alfons Tuor per lunsch il catechissem, era sch'il poet includea tuts quels che piteschan: «*Pertgei ston ins pitir, pitir, e lu murir*»? **Ses** mals, **sia** malsogna, **sia** suffrientscha, **sia** tema dalla mort eis ei che fan «*la tiara stgira*». Il mund – ina paupra val da larmas! La veta – in continuau semudergiar!

### Savens jeu stoiel vus contemplar...

Da vegl enneu ha il carstgaun, per capir siu destin, contemplau il tschiel stelliu ed encuretg risposta sin sias damondas existenzialas el firmament<sup>18</sup>. «*Aulza tes egls encunter tschiel e dumbra las steilas sche ti eis capavels, pertgei tala vegn ad esser tia progenitura*», di Jahve ad Abraham egl emprem cudisch da Moses (15,7). Kant, il filosof, ha fatg dil tschiel stelliu sur el e dalla lescha eterna enten el dus garants dalla dretga morala humana.

Al disuorden dalla veta ed al caos dalla experientscha han ils vegls opponiu igl uorden digl univers, sia perfecziun, sia harmonia. Con-

---

<sup>17</sup> Senza funs e riva / Con ditg, o Segner

<sup>18</sup> Ina survesta da quei tema dat il pader benedictin da Mustér, BRUNO RIEDER, en sia dissertaziun: *Contemplatio coeli stellati: Sternenhimmelbetrachtung in der geistlichen Lyrik des 17. Jahrhunderts*; Bern 1991

templond il moviment absolutamein regular dallas steilas, meditond sur dil funzionnar dil tgierp human, senza emblidar il va e vegnir dallas stagiuns cun lur leschas naturalas, han ils carstgauns tschenta-ners alla liunga survegniu il sentiment che las caussas seigien sco ellas ein e ch'il mund mondi sco el va, quei vul dir: **endretg**. Ei tucca pia da sesuttametter al destin, gie schizun capir el sco **providientscha**. Ei sto dar, alla fin da quella liunga cadeina bein ordinada, la perfecziun **sezza**, numnadamein Diu, autur e garant da scadina perfecziun denter tschiel e tiara<sup>19</sup>:

Niessegner nus protegia  
Sul firmament stelliu;  
El cun siu maun diregia  
Tut gl'univers scaffiu.  
Ei ganc daventa caussa,  
Nuot senza siu saver;  
Tut en siu maun ruaussa,  
Pertgei er ton temer?

Da **quei** firmament, da **quellas** steilas, spetga Alfons Tuor avis! Alfons Tuor mira buca da finiastra ora encunter tschiel, el **contem-  
pla** il firmament stelliu. Tuor ei buca in mira-steilas. Contemprar san ins schizun cun egls serrai. (Tgi engarta schon il tschiel stelliu el tschurvem nocturn dil grond e bi Paris?) Quel che contempla quescha e surstat. El mira culs egls dil cor. El selegra ei crei. Alfons Tuor legia buca ellas steilas per endriescher ch'ei detti in Diu, el mira encunter tschiel per saver tgei plaz ch'el hagi egl univers!

Sper il tschiel stelliu eis ei la mar<sup>20</sup> che supren tier Alfons Tuor la medema funcziun:

Sco ti sil mund cheu saiel  
Anflar negin ruaus,  
Entoch jeu buca schaiel  
Afuns el tratsch satraus.

---

<sup>19</sup> Sul firmament stelliu

<sup>20</sup> Sper la mar

## O dei vus caras steilas a mi avis...

Han las steilas ussa dau avis al poet? Ei para sco sch'ei fuss aschia, pertgei suenter ver contemplau las caras dultschas steilas sa il poet pertgei ch'el viva «*mo in mument.*» Mo tgei pomai han las steilas scutinau a Paris al giuven student, passiunaus da filosofia, plagaus dil schar encrescher, mudergiaus dalla malsogna? Ellas han renviau il poet a siu plaz enteifer igl univers ed il cuors dalla veta:

O, quel ch'ei **vies** Scaffider  
Ha **mei** scaffiu,  
Quel che **vies** cuors diregia  
Ei er **miu** Diu!

Alfons Tuor secaveglia viaden egl uorden dil mund e daventa ina part da quel. Fatalissem? Resignaziun? Destin? Bugen vessan nus intervegniu in tec dapli digl avis che las steilas han dau al giuven carstgaun malsanetsch che leva saver pertgei ch'ins vivi mo in mument. Il poet para da salvar il misteri per el, e quei ei siu bien dretg<sup>21</sup>. Quei che las steilas dian, dian ellas en confidanza. Sur dalla poesia regia in curios silenzi, sco sche mintga lectur, mintga lectura stuess sez anflar la risposta sin ses pertgeis.

Podà che nossas damondas, nos pertgeis, ein collectivs, la risposta denton sa esser mo singulara. Ed ual cheu engartein nus in dils tratgs ils pli perschuedents dalla canzun d' Alfons Tuor. Il poet passa vonzeivi digl «*ins*» al «*jeu*». La damonda dil pitir e dalla svaneivaldad dalla veta veva el drizzau allas steilas en num da biars, e forsa en num da tuts: «*Pertgei viv' ins sin tiara, mo in mument*»?

La risposta dattan las steilas mo per el, igl Alfons Tuor, ed il poet retscheiva lur avis sco risposta persunala, gie intima<sup>22</sup>. Alfons Tuor damonda per tuts e rispunda mo per el sul sulets. E perquei ei la risposta dalla canzun ual buca ina risposta prida ord igl arsenal dil cudisch da ductrina:

---

<sup>21</sup> Schai cheu la clav d'interpretaziun denter l' emprema versiun dallas *Steilas*, pli explicita, pli patarlusa, e la versiun tardiva, pli suggestiva, pli gigina?

<sup>22</sup> La poesia d'Alfons Tuor ei buca pli «*l'expressiun da sentimaints generels, ma quella eminentamaing persunela da si' orma sensibla chi sofra*»; BEZZOLA, 447.

O caras, dultschas steilas,  
Jeu sai, jeu sai:  
Sur vus, en tschiel, leu vivan  
Ils spérts beai!

Ins astga veser en quei «*jeu*» in act d'individuaziun per propi. Igl ei la malsogna maligna, l'experientscha dalla munclusadad e svaneivladad dalla veta, l'anguoscha da mort, che han lubiu al poet dad anflar sesez e gidau el leutier. Carschius si en in ambient social che scheva «*ins*» cura ch'el maniava «*jeu*», en in context religius nua ch'il catechissem deva risposta collectiva ual per tuts, di il poet Alfons Tuor «*jeu*». Contemplond il firmament stelliu ha Alfons Tuor discuvretg co ei stat cun la veta, e cun sia veta en particular, e quella verdad ha fatg el libers. La suletta verdad che mereta quei num ei quella che liberescha, fuss ei quella da saver che jeu sai pauc ni nuot.

### E cu jeu vus contemplel, sai jeu...

La nunpagabla verdad dil poet ei ch'el viva mo in mument ed oravontut che quei ei bien aschia:

E cu jeu vus contemplel  
El firmament,  
Sai jeu pertgei ch'ins viva  
Mo in mument!

Alfons Tuor di buca pertgei ch'ins viva mo in mument, e quei in-tressescha era buca el pli. Il giuven poet fa tuttenina persenn il prezz dil **mument**, dalla veta cuorta, da quei cuort mument ch'el astga aunc viver. Sia malsogna mortala arva ad el perspectivas da veta.

Al character etern dil firmament oppona el alla fin da sia poesia, cun detschartadad, il cuort mument da sia veta e da tutta («*ins*») veta. Contemplond il sempitern vegn el cunscients dalla valeta dil temps. Fascinaus dalla splendur digl etern vegn el pertscharts dalla bellezza dil mument. Trentatreis onns cheu sin tiara, gliez vala ton, gliez vala dapl che las milliardas onns digl univers. Astgar far duront in cuort mument enzaconts pass sin quest mund, a Rabius, a Paris, a London, e lu puspei el vitg natal, gliez ei aschi custeivel sco da viver ellas sferas dils

spérts beai. La risposta sin il pertgei dil cuort mument ei **il mument sez** cun sia nundescribbla attracziun e tensiun.

E pren mira, vesend las steilas a sclarend **emblida** il cor suffrent dil poet il mal che taluna. El secumblida! El viva! Il **mument** eis ei che gida el sur ses mals ora. Il tschiel sedamonda buca pertgei – e se-mova tonaton.

Quei vul lu era dir che la damonda dil pitir resta ellas *Steilas* senza eco. Al poet che vul saver pertgei ch'ins stoppi sin tiara «*pitir, pitir, quei cuort mument ch'ins viva*», dattan las steilas negina risposta. Alla fin dalla poesia sa el pertgei ch'el viva mo in mument, denton buca pertgei ch'el sto pitir. La secunda strofa dalla *Steilas* ha effectivamein survegniu negina schumellina alla fin dalla poesia. Il mal sa il cor suffrent silpli emblidar, mo buca explicar, silpli acceptar, mo buca capir.

### Cura che las steilas cueschan...

Il firmament stelliu para dad esser strebels cun siu avis. Sco sch'il carstgaun stuess dar sez risposta allas damondas ch'el tschenta. Forsa ha Alfons Tuor schizun fatg la petra experientscha ch'il tschiel cuescha sin nossas damondas ed ei la finala indifferents, freids e crudeivels. Las steilas demuossan zun negina cumpassiun cun quel che pitescha. Fertion ch'il poet va sia via dalla cruscha fa il tschiel bucca da rir. In scandal<sup>23</sup>!

Curiosamein ei il Cristus **crucifigau** per Alfons Tuor insumma buca il Diu dalla cumpassiun che pitesco el e cun el. Tgi che contempla il tschiel immobil ha breigias da capir che la providientscha accumpogna nus el **schabetg**, e schizun el schabetg **tragic**. «*Per crucem ad lucem*» vesa Cristus sulettamein ord la vesta dil puccont che strida

---

<sup>23</sup> CARLI FRY, che contempla medemamein il tschiel stelliu, ei pli subtils en sia poesia *La ventira*. El lai bargir sias steilas ; Il tschiel trembla cul carstgaun :

Hai viu las steilas tarlichontas  
Anetgamein e securdar  
E da lur fatschas las tremblontas  
Hai viu sco larmas a curdar.

Diu, senza che la noziun da puccau vegni tematisada tier Alfons Tuor.  
Il puccau sco floscla?

Von tei che pendas vid la crusch  
Stun jeu enschanugliaus,  
Rugond tei cun tremblonta vusch  
Perdun de mes puccaus.

Adina puspei exprima Alfons Tuor era il patratg che sia malsogna seigi in castitg da Diu, senza ch'ins possi saver sche quei ei convenziun ni perschuasiun, aschia en «*Con ditg, o Segner*»:

Ti vesas co jeu stoi daditg  
En letg schi fleivels scher:  
Vul buca gleiti tiu castitg  
Da mei pupratsch retrer?

Ni fuss lur **cuescher** la risposta ch'ellas dattan a nus, las caras dulstchas steilas? Silenzi ei buca metadad! A tgi che mira las steilas rispundan ellas cun metadad, a tgi che contempla ellas, rispundan ellas cun silenzi. Tgi che vul tedlar il silenzi sto imprendder da quescher. Ha in poet lyric romontsch detg quei pli concis e grondius che Hendri Spescha?<sup>24</sup>:

Empren da quescher!  
Nossa spronza  
ei  
il  
silenzi.

Empren il silenzi!  
Nies salvament  
ei  
il  
quescher.

---

<sup>24</sup> HENDRI SPESCHA, *Uss – Poesias*, p. 144; «*Las creatiras resdan cun tuns, il Plaid da Diu ei silenzi*», scriva SIMONE WEIL; *Zeugnis für das Gute*, p. 48.

Quescha  
e lai  
plidar  
il  
silenzi!

### Dallas steilas al semnader...

Alfons Tuor, il cantadur dallas Steilas? Reducir el sin quella canzun e far ordad el in poet da baselgia fuss sbagliau. Alfons Tuor ha era descret il mund ed il cunfar **sut** las steilas, e quei en viarva aduala allas remas religiosas. Ei exista en sia ovra lirica in ligiom intim denter la contemplaziun dil tschiel e la contemplaziun dalla tiara. Quel che sa scrutar il tschiel sa era urentar la tiara. Tgi che s'intressescha pil mund **sur** las steilas ha era in fin sensori pil cunfar **sut** las steilas. Perquei ein las remas gitas e murdentas ch'il poet dedichescha al cunfar dils pussents, perquei ein sias lingias sensibilas pils clochards da Paris ed auters murtirai ual aschi significativas per enconuscher ed apprezzar Alfons Tuor sco sias poesias «bialas». Ei dat buca dus Alfons Tuor<sup>25</sup>.

Legend ils segns vid il firmament ha Alfons Tuor era empriu da legger ils segns dil temps, ils problems dil mund e dil mument, era las fleivleziyas dalla atgna val et las mendas da sia gliעד. Igl ei perquei dapl ch'ina casualidad ch'ina outra poesia denter las pli enconuschentas e fermas d' Alfons Tuor ei dedicada «*Al semnader*». Ella sefatschenta sco strusch ina outra cul cunfar **sut** las steilas, cun in dils muments ils pli captivonts en tuttas culturas, cun in dils acts ils pli profans e che daventa quasi sacrals ual perquei ch'el ei tondanavon profans:

Ti vesas co 'l semna, ti vesas co 'l passa  
Suls zuolcs vidaneu cun penibel quitau;  
Ti vesas co 'l aulza, ti vesas co 'l sbassa  
Encunter il tschiel e la tiara siu tgau.

---

<sup>25</sup> Era Ignatius da Loyola ha contemplau il tschiel stelliu e retschiert la pli gronda consolaziun. La tradiziun mistica la pli autentica ei denton adina seviulta viers il tschiel per lu sevolver aunc pli intensiv viers la tiara. In biograf sa da dir da sogn Ignazi: «*Siu tschiel era la tiara*»; BRUNO RIEDER, *Geist und Leben* 6/1992, p. 461.

Contemplond la splendor dil tschiel stelliu ha Alfons Tuor era saviu s'entusiasmar per in bi di el «*Meins de matg*» – e secumblidar:

Uss tut che respira  
Legrias cumpleinas;  
Perfin tgi ch'endira  
Emblida las peinas.

### Ina risposta pli gronda che la damonda...

Duront in entir tschentaner ein roschas da romontschs e romontschas sursilvans vegni en contact cun las *Steilas* d' Alfons Tuor<sup>26</sup>.

Da tgei dependan il success e la fascinaziun da quella canzun tochen sil di dad oz? Els derivan da cheu che Alfons Tuor ha dau a nus romontschs e romontschas en questa sia canzun **plaids e maletgs** per enzugliar nossas atgnas damondas, nos agens sentiments malguess, nossas atgnas anguoschas vitalas. Alfons Tuor ha cheutras ademplier quella missiun che nus auters che vein buca il dun dil plaid lessen surdar e confidar a scribents e poetas dad jer e dad oz, numnadamein quella dad empristar a nus plaids e maletgs per exprimer las damondas veras dalla esistenza humana – e forsa schizun Brustgas per formular nossas rispostas. Duront in tschentaner ei la schientscha romontscha serenconuschida ella damonda che Alfons Tuor drezza allas steilas: *Pertgei viv' ins sin tiara mo in mument, e pertgei ston ins pitir, pitir, quei cuort mument ch'ins viva, e lu murir?*

Biars – buca tuts! – ein era serenconuschi en sia **risposta**. La davosa strofa dallas *Steilas* endrida e carmala ual perquei ch'elle zuppa dapli che quei ch'ella revelescha. Pertgei ch'ins viva sin tiara mo in mument, gliez di Alfons Tuor buc. El dat, sco ver poet, ina risposta pli gronda che la damonda. Quella sia risposta, unica e persunala, daventa sezza ina damonda. La risposta ei pli aviarta che mai! Gie, pertgei viv' ins sin tiara mo in mument? E tgei far ord quei mument? E sch'il mument quintass dapli ch'igl etern? La veta leugiu ton sco la veta leusi?

---

<sup>26</sup> A Rabijs ein pliras generaziuns carschidas si cun il losch sentiment che lur vitg s'audi tier quels che han buca mo ina ustria ed ina stizun, mobein aunc in poet. Fuss la fiasta dil centenari a Rabijs stada pussevla senza quella schientscha profunda?

## Sestezza la burnida?

Igl ei buca sclaus che l'energia dallas *Steilas*, sia burnida per aschidadir, sestezza plaun plaunet suenter in tschentaner. La sera litterara a Rabijs ha leventau la discussiun schebein ins tschenti aunc oz quella damonda, la damonda per tgei (!) viver e per tgi (!) murir.

Numerus indezis laian sminar ch'ina giuvna generaziun serenconuschi buca pli els plaids ed els maletgs che Alfons Tuor ha dau a ses lecturs e lecturas ellas *Steilas*. Lur veta serestrenscha dalla biala entschatta enneu a sia componenta terrestra ed il tschiel sco speranza alternativa exista buca pli en la societad secularisada. Neginas steilas ein pli dentuorn per consolar igl individi modern d'ina existenza finalmein futida, tragica, absurda (ni lu heroica) dapi ch'el ei buca pli cheu sin tiara «*per survivir a Diu e vegnir enta parvis*».

Els ed jeu che havein starschau il *Catechissem da Trient* e mess sin cruna las *Steilas dil poet da Rabijs* tenin mirau sch'ei levi vonzeivi poets e poetas romontschs che emprestan a nus, en nies desiart spirtal e spirtual, **novs plaids e novs maletgs** per dir nossa perplexadad en vesta al fatg che nus vivin, era nus, **mo in mument**<sup>27</sup>.

---

<sup>27</sup> Igl ei buca sclaus che las *Steilas* d'Alfons Tuor enconuschien ina renaschientscha. Dapi che la filosofia ha calau da tschentar il carstgaun el center digl univers e da sia reflexiun ha la cosmologia la pli classica survegniu in niev cudez. La devoziun cosmica pren novas dimensiuns. Podà ch'igl avis dil tschiel stelliu cuntenta buca nies intelletg, poeticamein denton (e religiosamein!) restan las steilas ina referenza magica – sco la celebra rosa d'Angelus Silesius che flurescha per negin e senza zun negin pertgei. Ella ei semplamein **cheu** ed ella ei **biala**!

Die Ros' ist ohn' warumb / sie blühet weil sie blühet /  
Sie achtt nicht jhrer selbst / fragt nicht ob man sie sihet.

